

INFO US\$AHAWAN

usahawan pemacu ekonomi mapan



EDISI

26

ISSN 1823-6421

KESAN KENAIKAN OPR KEPADA PENIAGA KECIL

Noorhayati Yusof Ali¹, Zuriyati Ahmad¹, Roseziahazni Abdul Ghani¹

¹Fakulti Pengurusan dan Perniagaan, UNIVERSITI TEKNOLOGI MARA, Dungun, Terengganu.

*Koresponden: noorhayatiy@uitm.edu.my

Apa itu OPR? OPR ialah kadar dasar semalaman yang ditetapkan oleh bank pusat, Bank Negara Malaysia (BNM) bagi menentukan kadar faedah yang perlu dibayar oleh bank peminjam kepada bank pemberi pinjaman ke atas dana yang dipinjamkan untuk tempoh satu malam. OPR ini sangat penting dalam dasar monetari negara kerana ia akan mempengaruhi pelbagai aspek kewangan seperti kadar deposit, kadar pinjaman, kadar pertukaran wang asing, dan sudah tentu faedah pembiayaan perumahan.

Sejak wabak Covid-19 melanda negara pada awal tahun 2020, Bank Negara telah menurunkan OPR sebanyak lima kali, daripada 3.25 peratus kepada 1.75 peratus. Ini bermakna lebih ramai orang boleh mendapatkan kelulusan untuk pinjaman bank kerana kadar faedah yang rendah. OPR diturunkan semasa pandemik supaya lebih wang yang sepatutnya dibayar kepada bank dapat digunakan oleh rakyat untuk menggerakkan ekonomi di peringkat akar umbi. Keputusan Bank Negara itu disifatkan tidak popular tetapi pakar ekonomi meramalkan nilai OPR akan dinaikkan semula sebaik pembukaan semula ekonomi pasca pandemik. Ramalan ini menjadi kenyataan apabila Bank Negara Malaysia (BNM) telah meningkatkan Kadar Dasar Semalaman (OPR) sebanyak tiga kali sejak bulan Mei 2022 dengan setiap kenaikan sebanyak 25 mata asas daripada 2% kepada 2.25% pada 6 Julai 2022 dan 2.5% pada 8 September 2022. BNM memberi bayangan yang perubahan dasar monetari akan terus dilakukan dengan kadar pantas bagi mengekang tekanan inflasi ekoran peningkatan harga komoditi yang ketara.

Menurut Mohamad Abdullah dari Persatuan Penjaja dan Peniaga Kecil Melayu Wilayah Persekutuan kenaikan dalam OPR tidak membantu dalam mengurangkan kos operasi atau masalah bekalan kepada peniaga tetapi ia hanya mengurangkan kuasa beli pengguna dan memaksa mereka berbelanja dengan lebih berhemah dan hanya membeli belah di tempat yang lebih murah. Namun begitu impak daripada kenaikan OPR adalah minimum bagi penjaja kecil yang tidak mempunyai pinjaman. Dalam keadaan kenaikan kadar faedah, Bank SME menggesa perusahaan kecil dan sederhana (PKS) melakukan apa yang perlu bagi memastikan operasi dan perniagaan mereka dapat diteruskan. Sebagai contoh, bagi perniagaan dalam industri makanan, kenaikan OPR akan menambah kenaikan harga baja dan kos logistik, justeru meningkatkan lagi harga makanan. Sehubungan itu, kerajaan mesti melaksanakan program bantuan tunai bersasar untuk isi rumah B40 seperti baucar makanan dan lebih banyak insentif untuk perniagaan yang boleh meningkatkan pengeluaran domestik.



Date	Change in OPR (%)	New OPR Level (%)
8-Sep-22	0.25	2.5
6-Jul-22	0.25	2.25
11-May-22	0.25	2
3-Mar-22	0	1.75
20-Jan-22	0	1.75
3-Nov-21	0	1.75
9-Sep-21	0	1.75
8-Jul-21	0	1.75
6-May-21	0	1.75
4-Mar-21	0	1.75
20-Jan-21	0	1.75
3-Nov-20	0	1.75
10-Sep-20	0	1.75
7-Jul-20	-0.25	1.75
5-May-20	-0.5	2
3-Mar-20	-0.25	2.5
22-Jan-20	-0.25	2.75
5-Nov-19	0	3
12-Sep-19	0	3
9-Jul-19	0	3
7-May-19	-0.25	3
5-Mar-19	0	3.25

Jadual 1: Overnight Policy Rate Decisions

Sumber: <https://www.bnm.gov.my/monetary-stability/opr-decisions>

Ramai yang kecewa kerana kerajaan hanya bergantung kepada OPR sebagai cara tunggal untuk menangani inflasi. Dewan Perniagaan Melayu Malaysia (DPMM) meminta agar kerajaan mempertimbangkan untuk pemberian moratorium kadar faedah pinjaman kepada PKS dan pekerja dalam sektor PKS. Dengan carai ini ianya menepati tujuan kenaikan OPR iaitu untuk mengurangkan penambahan wang baru oleh bank ke dalam ekonomi. Kerajaan mungkin terlalu optimis bahawa trajektori pertumbuhan ekonomi yang teguh tahun ini akan mengatasi semua isu asas ekonomi yang berkaitan dengan gaji yang tidak stabil, kuasa beli pengguna yang merosot dan hasil perniagaan. Bagaimanapun, pertumbuhan itu tidak sekata berikutan pelbagai cabaran baharu seperti harga makanan yang melambung tinggi dan kenaikan kos berkaitan inflasi global yang disebabkan oleh perang Ukraine dan gangguan rantai bekalan, kekurangan buruh asing yang teruk yang masih tidak dapat diselesaikan, susut nilai ringgit, penggubalan dasar yang tidak konsisten dan berubah-ubah, birokrasi birokrasi dan tadbir urus yang lemah. Atas sebab ini, PKS memerlukan bantuan kewangan daripada kerajaan, termasuk moratorium pinjaman bank dan pengecualian kadar faedah, bagi memastikan perniagaan mereka dapat bertahan selepas pandemik seperti fasa pandemik COVID-19.

Rujukan

- [1] <https://www.nst.com.my/opinion/letters/2022/05/800154/opr-hike-head-inflation>
- [2] <https://www.propertyguru.com.my/bm/panduan-hartanah/apakah-opr-malaysia-dan-kesan-pinjaman-perumahan-44771>
- [3] <https://www.malaysianow.com/news/2022/09/09/the-effect-of-opr-hikes-on-small-businesses>

